


Copa Clasico Aruba 2001 dedica na Joy Kock Oslin Boekhoudt



ORANJESTAD(AAN)- Diadomingo awor ta cuminza riba Caribe Ballpark un torneo di softball Bush-league organiza pa Botica Central Clippers Softball Team.

E torneo lo hiba e nomber di Copa Clasico Aruba 2001 y ta ser dedica na dos persona bon conoci den e mundo di softball, esta Joy Kock y Oslin "Chin" Boekhoudt.

JOY KOCK

Joy a cuminza hunga baseball cu 8 aña den e team di bario cu tabata "Watertoren Boys". Esaki tabata prome cu tabatin Little League aki na Aruba. E tempo ey e teamnan di bario di Playa cu tabata Companashi, Eagle, Rancho, Klip, Mon Plaisir y Watertoren Boys tabata hunga contra otro.

Joy a hunga despues pa Sint Thomas Boys y La Salle tanto den A-klas como Doble A.

Tambe den softball Joy tabata activo y a hunga pa Eagle Stars como pitcher y primera base.

Pa motibo di un lesion fuerte na rudia Joy tabata obliga di bandona deporte na edad hoben pero awor ta back den softball veterano despues di hopi aña.

Joy ta hungando awor pa 11 aña cu Aruba Jrs y den e ultimo añanan Joy ta maneha e equipo.

Joy a maneha y hunga softball na Curaçao, Costa Rica, Puerto Rico, Estado Falcon, San Felipe, Santo Domingo, Cuba y a enfrenta un equipo di Hulanda aki na Aruba.

Joy tabata e prome locutor cu a nara un wega di baseball na Papiamentu pasobra den e

epoca ey ta na Spaño so tabata transmiti weganan di baseball.

Joy no por a permiti cu nos Papiamentu no ta ser respecta. Cuatro aña pasa Joy a maneha Aruba Jrs Vets y a logra e sub-campeonato den Liga Mayor di Softball.

Despues no tabatin mas campeonato oficial.

Na '99 Aruba Jrs Vets ta logra e titulo di campeón den e torneo di North Eagle Stars.

Na April ultimo Aruba Jrs Vets ta gana un intercambio na Estado Falcon contra A.J.I.P.

Tur esaki bao maneho di Joy Kock kende ta alavez fundador di torneonan Himno y Bandera y Copa Clasico di Softball.

Varios hungador a ser honra danki na e iniciativa di Joy, entre otro Paus Ruiz, Alfredo Ruiz, Luis Swaen, Nel Harms, Ramon Buckley, Josito Muyale, Ro Agunbero, Fanta Ponson, Feki Caster, Edwin de Cuba, Juan van der Biezen, Ruben Phillips, Boei Brion, Benny Geerman, Victor Albus, Vicente Williams, Gladeis Reyes, Cabo Quilotte, Dagigi Martinez, Pantin Guerrero (q.e.p.d.), Chico Romero (q.e.p.d.), Tico Kuiperi (q.e.p.d.), y como umpire Benito "Mito" van der Biezen.

Apesar cu Joy ta bon conoci como musico e a practica varios otro ramo di deporte tambe manera futbol, basketball y ping-pong.

Ademas e ta un scuba-diver diploma P.A.D.I. y ta dive pa hobby.

Actualmente e a reanuda

training di tennis na Eagle International Tennis Club.

OSLIN "CHIN" BOEKHOUDT

Oslin of manera su amigonan ta yame "Chin" tambe ta di e bario di Playa y a biba practicamente benter su bida aki na Aruba cu excepcion di algun aña cu e a pasa na Curaçao y tempo cu e a bay Hulanda pa sigui estudio di maestro di school.

Oslin ta un persona masha versatil, tambe den deporte.

El a practica diferente deporte, entre otro futbol, softball, baseball, volleyball, tennis di mesa, watersky y judo.

E prome deporte cu e a siña tabata futbol na school.

E tempo aya tabata haci hopi deporte na school aunque no tabatin e facilidadnan cu tin awendia.

Regularmente e tabata den team di school tanto den futbol, baseball y softball.

Softball no tabata mucho conoci na Aruba.

Ta e wega crioyo "bomba" tabata conoci y tabata hunga riba cualkier tereno habri.

Durante Segunda Guerra Mundial a sera mihor conoci cu softball y baseball mediante e Americanonan cu tabata staciona na Aruba.

Pariba di Watertoren y dilanti di cas di famia Escalona e muchanan di bario tabata reuni pa hunga un wega tur atardi cu bala di tennis y palo di basora.

Ora cu a bira mas grandi a cuminza practica cu bala di softball mes.

Pero bisinan tabata keha ya

cu e muchanan tabata kibra hopi glas di bentana y porta.

Mester a busca otro lugar. Poco poco un grupo di amigo a cuminza organiza y a forma Estrellas del Caribe.

Na veld di Aruba Jrs nan tabata hunga regularmente nan torneo.

Algun di e amigonan cu Oslin ta corda ta entre otro Ernesto y Alfredo Rosenstand, Nilo Luis Swaen, Paus Ruiz, Boeis Brion, Hildo Quilotte, Bubuchi y Fefe Montaneer (q.e.p.d.), Max Fingal y Luis Angie.

Un equipo fuerte di e tempo ey tabata Baby Ruth di San Nicolaas cu casi semper tabata gana tur torneo sin embargo un aña Estrellas Del Caribe a gana Baby Ruth y a titula campeón di Aruba.

Un fanatico grandi di Estrellas Del bario tabata Dandan Kock (q.d.p.d.) tata di e conocido Joy Kock.

Un dia Dandan a acerca nan y a puntra nan pa hunga den e campeonato di softball di Aruba na Lago Heights Club pero nomber di Aruba Jrs.

Apesar di nan edad hoben nan a dicidi di participa hayando refuerzo di Chia Brion (q.e.p.d.) y e famoso pitcher di e tempo ey Chico Romero (q.e.p.d.).

Nan a hunga y a logra e titulo sub-campeonil perdiendo di Caribe 2-1 den final.

Despues Chin a bay Hulanda

pa studia pa maestro di school.

Durante su estudio Oslin a practica futbol y a siña hunga volleyball.

Tempo pa deporte tabata sin embargo hopi scars.

Despues di a regresa Aruba Chin a hunga futbol cu La Salle y despues cu San Nicolaas Jrs.

Mas despues e a sigui hunga cu Teachers United.

Chin tabatin un equipo di Little League "Pepsicola" y uno di Senior League "Gibson" hunto cu Ben Coffie.

E mes a practica e deporte di softball den Tromp Cement Productions di Dakota y despues cu Companashi Clippers cu awor ta Botica Central Clippers.

Pero pa motibo di un rudia cu ta molostie Chin mester a retira definitivamente for di deporte activo dos aña pasa.

Sinemabrgo e ta un persona hopi activo den comunidad: Chin ta masha conoci den e mundo di actuacion, teatro.

Mascaruba ta mantene activo y den e simannan venidero nan lo ta presentando dos obra den nan Mini-Teatro Geechi Pieters.

Chin ta masha agradecido pa tur e momentonan contento y feliz cu e por a pasa cu tur su companeronan y amigonan. Hopi dushi recuerdo e tin di tur e bon temponan cu "deporte" a brindele.